

本草綱目拾遺

本草綱目拾遺草部中目錄

金豆子

夜闕門附

接骨仙桃

七葉黃荊

山黃荊

救命王

金不換附

黃麻葉

六月霜

山海螺

水楊柳

小將軍

九鼎連環草

牛筋草

翠羽草

半嬌紅

普賢線

藏紅花

土紅花附

阿勃參

茄連

靈通草

羅裙帶

金狗脊

雪裏開

雪裏花附

苦草

山馬蘭

野馬蘭

獨脚馬蘭

玉淨瓶

紗帽翅

石風丹

本草綱目拾遺 卷四
象鼻草

透骨草

不死草

拳黃雞子

雞腳草

刀鎗草

苦地膽

箭頭風

紅果草

勾金皮

琉璃草

仙人廩

金絲草

紅珠大錯草

金剛草

臺七里

番薏茹

馬尾絲

方正草

七仙草

大母藥

藍布裙

露筋草

百里奚草

黃德祖

斑節相思

野丈人

戴文玉

金果欖

雁來紅

天燈籠草

見腫消

千年老鼠屎

辟瘟草

魚鱗金星
鳳尾金星

水茸角

老鴉蒜

玉如意

四方如意草

水楊梅

野靛青

困來草

走馬胎

蒼耳子油

飛鸞草

青烟白鶴草

本草綱目拾遺卷四

錢塘趙學敏恕軒氏輯

草部中

金豆子

夜闌門附

百草鏡一名金花豹子三月生苗十月枯雖豆類
卻不起蔓本高一二寸分枝成叢葉似槐而稍大
處暑時開黃花五出磬口蠟梅似之結莢向上類
蜂躑而短長只二三寸實似綠豆而扁皮有紫斑
較綠豆稍大味淡

子 治疗癰如神

葉 治腫毒茅氏傳方以葉曬研醋和敷留頭卽消或酒下二三錢

按傳澹菴草花訣金豆子開黃花子如綠豆入滾茶味清香卽草決明寧憲王救荒本草有山扁豆卽莊芒決明味甘滑可作酒麴俗呼獨占缸苗葉花子皆可淪茹及點茶食所載形狀亦與金豆子同而瀨湖綱目決明後附莊芒云性平無毒火炙作飲極香除痰止渴令人不睡調中隋樹禪師探作五色飲以進煬帝者是也無治疔腫之說故並存以備考

夜關門

葉如槐夜卽合開黃花仁和覓橋人多種之俞曉
園云有草木二種草本者良木本者乃合歡也能
追風取皮治肺癰不斂熬膏貼毒生肌收口

按綱目馬蹄決明葉亦如槐晝開夜合其葉本小
末多秋開黃色花或卽係決明但綱目於決明子
下亦不言痲氣今並存之

茨 治痲氣

接骨仙桃

一名奪命丹活血丹蟠桃草生田野間似鱧腸草

結子如桃熟則微紅小如菉豆大內有蟲者佳百
草鏡仙桃草近水處田塍多有之穀雨後生苗葉
光長類旱蓮高尺許莖空摘斷不黑亦不香立夏
後開細白花亦類旱蓮而成穗結實如豆大如桃
子中空內有小蟲在內生翅穴孔而出採時須俟
實將紅蟲未出生翅時收用藥方全蓋此藥之
用全在蟲須曬焙令內蟲死若掛懸風乾恐內蟲
生翅而出藥亦無用矣按此草須芒種後採若過
夏至則蟲穴孔而出化爲小蚊苞空無用矣
性溫味甘淡消癰腫跌打或搗汁或屑服俱效

治肝氣和胃 集聽云一名八卦仙桃此草生田
野葉如石榴葉實如桃子絕小內生小蟲者眞取
實連蟲用○一方專治肝氣胃氣小腸疝症用仙
桃草有蟲者金橘核福橘核萼澄茄各等分爲末
砂糖調丸菜豆大每晚服一錢許至重者二服斷
根

治勞損虛怯 百草鏡云取有蟲仙桃草用童便
製透入補藥用

治吐血 百草鏡云用新鮮接骨仙桃草搗汁加
人乳和服按吐血諸方皆用涼血之劑惟此藥性

熱加人乳能引血歸經故妙

跌撲損傷 救生苦海用地蘇木五錢八角金盤
根一錢接骨仙桃草五錢臭梧桐花三錢煎酒服
七葉黃荊

一名豬臥草地五爪珠子草烏食草烏蛇草七絃
琴亦名七葉黃荊藤生土牆腳下陰地葉尖長相
對三四行成一瓣莖上起稜一凹間紫色白露後
抽心高三五尺開細白花成簇結子亦細碎霜後
紅如珊瑚細珠根長而白入藥○百草鏡云此種
有木本者名芊芊活治跌撲癰腫

味甘生服能令人吐

治勞力傷跌打魚口漆瘡煎湯洗

治便毒 搗汁將肥皂一個煨存性調酒服渣敷患處罨之

治跌撲損傷閃腰挫氣痛 集聽云此秘方也用烏蛇草曬乾爲末砂糖酒調服最凶者加童便須端午日午時收者更效若急用不拘時日取鮮者搗爛服發汗愈此草有五名一曰烏蛇草一曰烏龍草一曰豬臥草一曰七葉黃金因其葉七片一枝或五片大者九片其根名千秋藤九十月間頂

上結紅子曬乾吞之可治疝氣

汪連仕草藥方七葉黃荆俗呼扞扞活又名放棍
行又名珊瑚配與烏蛇草別 行血敗毒洗一切
瘡疥鬼箭風

山黃荆

玉環志葉似楓而有杈結黑子如胡椒而尖可屑
粉煮食又有水荆似藜結黑子不可食剪其枝可
以接梨入藥用山荆

消食下氣

退管方 黃荆條所結之子炙燥爲末五錢一服

黑糖拌空心陳酒送服專治痔漏之管服至管自退出

九竅出血 救生苦海黃荆有二種赤者爲桔青者爲荆其木心方其枝對出一枝五葉或七葉葉如榆葉長而尖作鋸齒五月時開花紅紫色成穗子如胡荽子大有白膜皮包裹用其葉搗汁酒和服二合立止

骨蒸勞熱 養素園驗方六月雪黃荆子稀荻草何首烏當歸川芎熟地白茯苓水二鍾薑三片煎八分服有痰加半夏

漆瘡 姚希周經驗方烏蛇草不論鮮乾一握煎湯一洗卽愈

傷寒發熱而呃逆者 回春用黃荊子不拘多少炒水煎服立止

杖瘡起疔甲 黃荊子焙乾爲末搽上卽開不用刀刮

肝胃痛 周山人方用黃荊子研末和粉作團食一二次斷根

腳蛙 周氏方用黃荊嫩腦葉搗爛罨上卽愈

救命王 金不換

一名死裏逃生

治小兒感冒風寒咳嗽大人傷力損傷吐血諸風
疼痛無名腫毒

金不換

亦名救命王似羊蹄根而葉圓短本不甚高此草
出於西極傳入中土人家種之治病故山澤中不
產立春後生夏至後枯用根綱目三七亦名金不
換與此別又木本亦有金不換

汪連仕草藥方金不換大葉者爲金鉢孟大接骨
草細葉者小接骨草吐血頗效因呼爲吐血草軍

中箭傷罨之效卽呼箭頭草

性平破瘀生新治跌打消癰腫止血愈疥癬和糖醋搗擦 截蟲傷用葉搗塗 治肺癰

葉能伸臂力開硬弓臂痛或力弱不能弓者取其葉揉軟覆膊上以帛束之過夜痛者卽定疼且全力俱攝入臂上開弓更不費力營伍需爲要藥

腫毒初起 百草鏡金不換草根葉不拘搗碎五錢陳酒煎服

肺癰 百草鏡金不換草取根一兩或葉七瓣搗汁酒煎服三次愈不論口臭吐穢物者皆效

風痛，楊氏驗方金不換錢半小活血枳殼蘇葉
當歸各三錢烏藥川芎各二錢花粉五錢老酒一
觔煎熱服

跌打疼痛風氣 葱航活人書救命王卽金不換
葉如冬菜葉春夏用葉冬用根搗汁沖酒服渣加
毛腳蠟搗爛敷如風氣只用渣敷

汪連仕方行血破血合地蘇木落得打共酒服

黃麻葉

醫方集聽云此治諸血之聖藥一名牛泥茨一名
三珠草一名天紫蘇三月生苗如麻葉有微毛取

葉嚼之味如苦蘿久嚼微辛大葉旁兩小葉如杏
葉至八九月每葉生子三粒狀如粟米子內一粒
如菜子嫩時青色老卽黑色取子入藥治咳傷肺
開花細紫紅色自五月起至十月止處處有之

治血症集驗取葉同虎杖龍芽用 血崩集驗用
黃麻葉連根搗爛酒煎露一宿次早服之

氣症心疼肚痛痢疾痞結

子 治咳傷肺

汪連仕云大麻子卽黃麻子性熱行血醫人合麻
藥共風茄用

六月霜

丁未余館奉化邑人暑月俱以此代茶云消食運脾性寒解暑如神五月內山村人率刈乾束縛挑入城市售賣予以百錢買得一束如乾薄荷狀而長大倍之莖上綴白珠成穗土人云子能下氣消食更甚於枝葉偶得痞悶不快因取一枝沖湯化茶飲次日卽健啖異常所言信不妄也○三才藻異一名六月冷卽曲節草也性寒故名花似薄荷葉似劉寄奴名蛇藍

解暑消積滯小兒暑月泡茶食之佳

性苦寒亦厚腸胃止痢開膈食之令人善啖凡傷寒時疫取一莖帶子者煎服之能起死回生屢試皆效又善解毒洗瘡疥皆愈

按綱目曲節草一名六月霜瀕湖所引圖經云甘平無毒治發背消癰拔毒同甘草作末米汁調服而他治有殊功並未言及今仍補之

山海螺

生山溪澗濱隰地上葉五瓣附莖而生根如狼毒皮有縐旋紋與海螺相似而生於山故名雖生溪畔性卻喜燥枝葉繁弱可以入盃玩。百草鏡云

生山土二月採絕似狼毒惟皮疙瘡搗破有白漿
爲異其葉四瓣枝梗蔓延秋後結子如算盤珠旁
有四葉承之

治腫毒癰癤取汁和酒服渣敷患處

汪連仕云苗蔓生根如蘿蔔味多臭治楊梅惡瘡
神效○王安采藥方山海螺一名白河車加紫河
車紅白石膏名四聖散治腸癰便毒臟毒乳癰疽
皆效

水楊柳

張琰種痘新書云水楊柳乃草本生溪澗水旁葉

如柳其莖春時青至夏末秋初則赤矣條條直上不分枝極至秋略含赤花凡痘焦紫乾枯者以此洗之立見光亮漿水卽行其效如神已洗之後若往視之則已洗未洗之處其明潤焦暗形色判然取水行漿之効孰有速於此者但須用巾蘸其藥水頻頻與拭必水足而後已也若秋冬葉落取根用之○瀕湖綱目木部有水楊亦主痘毒引魏直博愛心鑑浴痘法但所載形狀與此全別惟於集解下註有赤楊與張琰所說不甚相遠而又無主治故爲補之

性微寒味缺涼血解毒痘瘡焦黑浴之立起

治跌打損傷痲瘋瘰癧疫解暑鬱惡毒

治痘水楊柳湯 張琰治痘紅紫乾燥不起漿有

水楊柳湯云古方所載是木細葉紅梗枝上有圓
果果有白鬚散出此等俗呼水楊梅以其葉似楊
梅也余未試用余常用者乃是草生水邊葉如柳
葉其梗至秋則紅赤無菓結此草冬用枝梗及根
春夏秋用枝葉凡痘紅紫乾枯不起水者內服活
血解毒之劑外用此煎水拭頭面連拭數次立見
光潤卽具行癘之勢所未洗者其色不變

手足拘攣 費建中救偏瑣言用草本水楊柳酒煎服甚驗

痔漏洗方 傳信方水楊柳根煎湯洗俟蟲出愈
膀胱落下 劉羽儀驗方此名茄病其色或紫者
可治白者不可治黃連一錢狗脊水楊柳根五倍
子魚腥草四味多寡不拘枯礬錢許共爲末煎湯
先熏後洗乘熱時輕輕托進睡臥一二日卽愈再
服調理藥

毛世洪經驗集扞扞活卽水楊柳其根可治楊梅
結毒

小將軍

一名研星草散血丹生陰濕地立春後有苗葉類
狗卵草略大莖微紅穀雨後開花細小結子二粒
如荷包草子○百草鏡二月發苗葉如雙珠草節
間生子如鵝不食草子而略大三月採五月枯

葛祖方治黃疸腳氣丹毒遊風吐血咳血

百草鏡治跌撲刀傷癰腫痰中帶血洗疥瘡

採藥志性溫敗毒治杖傷跌打損傷搗汁酒和服
渣罨患處立刻消腫而愈

金居士選要方治跌撲用五靈脂三錢麝香錢半

小將軍草三兩鮮者取汁先將酒煎上二味待好去渣再入藥汁滾一二沸取服

僧鑑平言此草治疔腫如神不論疔生何處及何種疔皆可用此搗極爛敷瘡口留頭次日卽乾緊肉上洗去再敷至重者敷二次卽愈輕者一塗卽好真救疔垂死之聖藥也親試神驗

九鼎連環草

一名九葉雲頭艾三月生苗係子出高二三尺葉似艾菊香亦近之霜後枯產口外五臺山二處近有人帶種各處可植八九月間起穗結莖類野菊

蔬但不開花結實其實如野菊花心○百草鏡春
月發苗葉類艾菊香亦近之八月時無花而實實
先起疙瘩逐漸長大內包十餘子子細長小葉乾
之甚香黃梅時須不時焙曬否則易黴黴則無用
性溫通行氣血治風痺有效

風痺 百草鏡用九鼎連環草乾者二兩核桃肉
三兩搗爛當歸一兩五錢黃酒浸隔水煮用

牛筋草

一名千金草夏初發苗多生階砌道左葉似韭而
柔六七月起莖高尺許開花三叉其莖弱韌拔之

不易斷最難芟除故有牛筋之名

根入藥治脫力黃勞力傷治療取此草連根淨去
泥烏骨雌雞腹內蒸熟去草食雞良○百草鏡行
血長力入肝經

按湖州府志南天燭亦名牛筋草又名烏飯草與
此名同物異

翠羽草

一名翠雲草孔雀花神錦花鶴翎草鳳尾草其草
獨莖成瓣細葉攢簇葉上有翠斑○花鏡翠雲草
無直梗宜倒懸及平鋪在地因其葉青綠蒼翠重

重碎蹙儼若翠鈿雲翹故名但有色而無花香非
芸也其根遇土卽生見日則萎性最喜陰濕粵志
孔雀花可以辟暑

汪連仕采藥書翠雲草一名翠翎草卽矮腳鳳毛
治痔漏同胡桃葉煎洗 汪連仕方

治吐血神效 百草鏡女子吐血翠雲草三錢水
煎服

嘉慶癸亥予寓西溪吳氏家次子年十五忽腹背
患起紅癩蔓延及腰如帶或云蛇纏瘡或云丹毒
乃風火所結血凝滯而成予疑其入山樵採染蟲

毒乃以蟾酥犀黃錠塗之不效二三日癰愈大作
膿復與以如意金黃散敷之亦不效次日瘡旁復
起紅暈更爲濶大有老嫗教以用開屏鳳毛卽翠
雲草也搗汁塗上一夕立消此草解火毒如此又
不特治血神效也

半嬌紅

一名老鶴紅水雞冠立夏後生苗一莖直上莖紅
葉尖長而狹八月結實六角五月採
治風痺跌撲煮羊肝食退目中紅障

普賢線

山川典產峨眉山乃樹上苔鬚蔓引而成長數尺
或言深谷有尋丈者湖湘故事載羅漢條卽此唐
駕湖曰普賢線產峨嵋山乃普賢石上青苔也山
僧採取曬乾以爲上藥。益部方物記仙人縮生
大山中與苔同種但巖陰石隈多鮮翠長二三尺
叢垂若縮。敏按酉陽雜記仙人條出衡岳無根
蒂生石上狀如同心帶三股色綠亦不常有條卽
縮也此生石上者方入藥無疑

治胃脘心氣疼痛煎服瀕死者皆效

藏紅花

土紅花

出西藏形如菊乾之可治諸痞試驗之法將一朶入滾水內色如血又入色亦然可沖四次者真綱目有番紅花又大薊曰野紅花皆與此別

治各種痞結 每服一朶沖湯下忌食油葷鹽宜食淡粥

治吐血 王士瑤云不論虛實何經所吐之血只須用藏紅花將無灰酒一盞花一朶入酒內隔湯頓出汁服之入口血卽止屢試皆効

土紅花

福建續志土紅花大者高七八尺葉如枇杷而小

無毛秋生白花如粟米粒生福州及南恩州山野
中福州生者作細藤似芙蓉上青下白根如葛頭
入藥薄切用米泔浸一宿更用清水浸一宿搗服
阿勃參

程賦統會云產拂林國 華夷花木考阿勃參出
佛林國長一丈餘皮色青白葉細兩兩相對花似
蔓青正黃子似胡椒赤色斫其枝汁如油其油極
貴價重千金

油塗疥癬卽愈

茄連

本草綱目卷四
延綏鎮志葉如藍草而肥厚種之畦塍根圓大類
葵露出土外開黃花京師謂之撒藍
能解煤毒

靈通草

楚庭稗珠僧建公之徒叅悟患龔達公謂得羅浮
靈通草始瘳叅悟來博館入山於玉女峯得此草
莖長三尺如箸而莖虛中兩頭皆實頂開七葉取
葉煎水服截其虛者貫兩耳中夜一聲若雷龔遂
開

治龔

羅裙帶

職方典出廣西南寧府葉滑嫩長二寸許似帶
治折傷損手足者取葉火煨微熱貼之卽愈

金狗脊

職方典出粵南寧府卽蕨根形如狗脊毛如狗毛
有黃黑之別

止諸瘡血出治頑痺黑色者殺蟲更效

雪裏開

雪裏花

雁山志性大寒深谷中有之能解砒毒冬時開

故名

治喉瘡熱毒萬氏家抄取根搗汁服

雪裏花

朱楚良在鎮海其土人有采雪裏花者冬月嚴寒此花始生在招寶山龍潭旁環渚而發苗甚短小如六月雪狀高不過二寸許每雪時開白花如豆大土人采得乾之入藥

敷痔以雪裏花爲末濕者乾糝乾者麻油調搽一二度其痔卽消縮

苦草

綱目水草類載苦草云生湖澤中長二三尺狀如

茅蒲之類主治白帶又主好嗜乾茶面黃二種病
其氣味藥性又失載今依張璐玉本經逢原補之
苦溫無毒香竄入足厥陰肝經理氣中之血產後
煎服能逐惡露但味苦伐胃氣竄傷腦膏梁柔脆
者服之減食作瀉過服則晚年多患頭風昔人畏
多產育以苗子三錢經行後麴淋酒服則不受妊
傷血之性可知

山馬蘭

甌江志別名一枝香按綱目馬蘭下集解註云又
有山蘭生山側似劉寄奴葉無極不對生花心微

黃赤大補血而不言其有治痰開塞之功。百草鏡山馬蘭治疔極效故又名疔見怕其蔓延到處節上生根故又名鬼仙橋皆俗見隨義而呼也。

治風痰喉閉驚風敷疔定痛搗汁塗小兒蛇癩煎湯洗痔腫疥痒。百草鏡

風痰喉閉 永嘉縣志山馬蘭取根搗碎用人乳浸男病用哺女婦人乳女病用哺男婦人乳浸少頃令病人仰臥撓上將頭倒垂將乳汁男左女右滴入鼻中候喉中有痰涎壅塞即轉身垂頭開口任痰自流痰定病愈但此藥入鼻後病人不許有

聲一作痰卽止

小兒驚風牙關緊閉煎汁灌入喉中卽愈

鎖喉風頭面頸項俱腫飲食不下 傳信方白馬

蘭搗爛井花水取濃汁白酒漿均調下喉立效

小兒頸項腿肋縫中潰爛 養生經驗方以馬蘭

汁調六一散搽之卽愈○馬蘭搗爲膏能治大人

兩腿赤腫流火或濕熱伏於經絡皮面上不紅不

腫其疼異常病人只叫腿熱他人按之極冷此謂

伏氣之病用此膏搽之立愈

流注 顧錦州傳方采山馬蘭煮熟麻油醬油作

本草綱目卷四
蔬伴食半月自消

野馬蘭

百草鏡云馬蘭氣香可作蔬此種係野生者其氣臭不可食三月發苗莖赤而粗秋開白花成簇細碎三月採因其功能涼血與馬蘭同故名莖葉根俱入藥

性寒涼血治濕熱蛇咬小兒癩瘡

獨腳馬蘭

李氏草秘此草生河澤邊葉如柳對葉圓梗

治發背諸腫毒熱癰搗汁一杯入酒二杯服之未

成膿者卽消有膿者卽出重極者服半碗或一碗
再劑渣罨

玉淨瓶

俗名猪屎草氣殺郎中白山桃春月發苗葉尖長
排生莖有白紋斑點高數尺葉對節生夏開細白
花成簇如華蓋結實如萊菔子大青圓霜降後紅
其根肥白十月採入藥

味甘性平和血行血有效治勞傷跌撲

汪連仕草藥方氣殺郎中草一名青背仙禽又名
疔見怕山人呼疔頭草其性清涼降火消癰毒散

腫拔疔根

紗帽翅

臺海采風圖此草一莖數十花色黃入藥用葉

治癰

石風丹

生石上能療瘡毒出雲南蒙化府

象鼻草

職方考出雲南府

治丹毒跌撲損傷

透骨草

珍異藥品云形如牛膝綱目有名未用下附透骨草亦未詳其形狀據其所引治病諸用乃鳳仙草也蓋鳳仙亦有透骨草之名與此迥別

療熱毒良

珍異藥品

治瘋氣疼痛不拘遠年近日 家寶方透骨草二兩穿山甲二兩防風二兩當歸三兩白蒺藜四兩白芍三兩稀荻四兩去莖用葉九蒸九曬海風藤二兩生地四兩廣皮一兩甘草一兩已上爲末用猪板油一觔煉蜜爲丸梧子大早晚各五錢酒下腿疼難忍 醫學指南核桃肉四個酸葡萄七個

斑蝥一個鐵線透骨草三錢水煎熱服出汗愈不問風濕皆效

治痞 醫學指南透骨草一味貼患處一炷香或半炷香時卽揭去皮上起泡卽愈

洗癰瘻秘方 醫學指南蛤蚧一個麻黃川椒透骨草防風大鹽各四兩白花蛇二錢艾一把槐枝一條川烏草烏各二兩紫花地丁一觔用水二桶煎大缸半埋在地入水溫時坐上洗再用水二桶煎渣候冷時再入熱水或一日或一夜臨出時用水澆頂心數次再用芥末稀貼患處紙絹裹熱坑

上唾汗出盡爲度忌早起飲食就臥內妙

汪連仕采藥書透骨草彷彿馬鞭之形大能軟堅
取汁浸龜板能化爲水合金瘡入骨補髓兼治難
產專主煉膏丹按鳳仙白花者亦名透骨白追風
散氣紅花者名透骨紅破血墮胎亦有透骨之名
非一物也

不死草

珍異藥品出柳州高一二尺狀如茅

食之延年暑時置盤中食物不腐并可辟蠅

拳黃雞子

珍異藥品一名水蘿藦

治霍亂吐瀉瘧疾每用一錢嚼碎水飲下

雞腳草

汪連仕采藥書卽雞爪花其子名勝光子

去星翳明目清肝

根 行血治風治大麻瘋鶴膝瘋雞爪風

刀鎗草

粵西叢載此草細葉黃花

止金瘡血

苦地膽

出粵西

葉可貼熱毒瘡

箭頭風

粵西叢載花似箭頭 職方典產廣西南寧府山

中花如箭鏃

治風四肢骨節痛煎水薰洗之愈

消痰治氣急定喘妙方 王登南方取箭風草放

鮮肉內煨熟要淡忌用鹽醬取出去草食肉

紅果草

叢載云有二種果大者葉略尖不入藥用又有果

如小指頭頂者葉圓邊花梗有軟刺入藥用

治牙痛酒刺

龍柏藥性考紅果草出廣西葉圓刺弱味辛煎湯
漱牙疼

勾金皮

珍異藥品云形未詳

治無名腫毒惡毒醋磨塗上卽消牙疼以皮塞牙
縫中卽定咽喉乳蛾每用三五釐細嚼嚥下

琉璃草

出始興玲瓏巖莖如芹梗與擎慶風藥相類食之

治風

仙人凍

一名涼粉草出廣中莖葉秀麗香猶藿檀以汁和米粉食之止饑山人種之連畝當暑售之○職方典仙人草莖葉秀麗香似檀藿夏取其汁和羹其堅成冰出惠州府

療饑澤顏

金絲草

出陝西慶陽

性涼味苦能去瘴解諸藥之毒

紅珠大鋸草

治膨脹黃疸 王安卿採藥志大鋸草敗毒消腫

清火

金剛草

治肺癰痔漏疔腫

臺七里

臺灣志卽七里香出臺地者能辟烟瘴所種之地

蚊蚋不生

辟瘴焚其烟化蚊蚋爲水

番薏茹

采風圖一名番苦苓一名心痛草種出荷蘭葉秀嫩似雲板曬乾則香結子青紅色

治一切心氣痛

馬尾絲

臺志略此草葉細而長花紅而小根如荔子核黃色多細絲如髮不拘鮮乾皆可用

治蛇蜂諸毒

方正草

福建續志出永春州葉狹而長藍色平分四方攢莖而上其實六瓣

治金蠶蠱

七仙草

三才藻異葉尖細長

治杖瘡

大母藥

四川通志出雪山石塊上有雌雄二種出必雙出
補元氣益髓脉功同人蓂

藍布裙

四川通志草本出松潘衛

治腳氣壯筋骨

露筋草

藻異生施州高三尺春苗卽花子碧色不彫

治蜘蛛傷瘡

百里奚草

藻異名殺羊齒產陰地如秋海棠

味酸治牙疼

黃德祖

藻異德祖卽石公號此草生地上故名葉如尖刀

獨梗芋花紅白頭如何首烏

治瘡癬

本草綱目卷之四
斑節相思

諸羅志枝葉類薄荷而大味似艾

性能解毒

野丈人

藻異葉似芍藥花類木槿白毛寸餘披下如白頭

翁

去腸垢消積滯

戴文玉

藻異戴文玉草名如金釵草黃色

療血疾

金果欖

出廣中百草鏡云出廣西性寒皮有疙瘩味苦色黃陳廷慶云內肉白者良但有二種一種味甚苦一種味微苦入藥以味苦者良

性涼解毒百草鏡云凡腫毒初起好醋磨敷露出患頭初起者消已成者潰咽喉一切症煎服一二錢卽效如喉中疼爛用三錢爲末加冰片一分吹之

藥性考金桔欖產廣西生於藤根堅實而重大者良藤亦可用味苦性大寒解毒咽喉急痺口爛目

痛耳脹熱嘔嵐瘴吐衄俱可磨服疽癰發背焮赤
疔瘵蛇螫蟲傷俱可磨塗

柑園小識金苦欖種出交趾近產於廣西蒼梧藤
邑蔓生土中結實如橄欖皮似白朮剖之色微黃
味苦土人每鑿山穿石或深丈許取之先君嘗覓
得二十枚愈數百人而疔喉等症有起死回生之
功當廣傳之以補本草之缺

性寒味苦能祛內外結熱遍身惡毒消瘴癘雙單
鵝及齒痛切薄片含之極神效磨塗疔瘡腫毒立

消 柑園小識

雁來紅

一名老少年無有用入藥者惟急救方有治腦漏
法用老少年煎湯熱薰鼻內然後將湯服二三日
大妙冬間用根 瀕湖綱目青葙下附雁來紅亦
無主治土宿真君本草雁來紅制汞

膏子眼藥去遠年星障○眼科要覽老少年銀杏
部殼爲君官渣根大葉者佳千里光雄楊梅樹根
皮爲臣煎成濃膏量加製甘石冰片又方加茶樹
根皮

花鏡老少年其苗初出似莧莖葉穗子與雞冠無

異至深秋本高六七尺則腳葉深紫而頂葉大紅
鮮麗可愛愈久愈妍如花秋色之最佳者又有一
種少年老則頂黃紅而腳葉綠爲別一種枝頭亂
葉叢生有紅紫黃綠相兼雜出者名十樣錦一種
根下葉綠頂上葉純黃者名雁來黃

天燈籠草

一名山瑚柳形似辣椒而葉大本高尺許開花白
色結子如荔枝枝外空內有綠子經霜乃紅京師呼
爲紅姑娘○按此草主治雖夥惟咽喉是其專治
用之功最捷綱目主治下失載故補之

性寒治咽喉腫如神

汪連仕采藥書金燈籠園人稱爲天燈籠種盆爲景更稱爲珊瑚架

性能清火消鬱結治疝神效敷一切瘡腫專治鎖纏喉風治金瘡腫毒止血崩酒煎服

又以反手取根七株去梗葉洗淨連鬚切碎酒二碗煮鴨蛋二枚同酒吃治瘡如神

子入藥保毒不大

王安采藥方

見腫消

一名土三七乳香草越人曰奶草初生苗葉面青

背紫葉似羊角菜多歧秋開小黃花如菊垂絲可愛根似芋魁人家多種之○按綱目有見腫消云其葉似桑治癰腫狗咬當別是一種○採藥錄見腫消生溪澗中葉有三角枝梗皆青根亦青色形如菖蒲根性涼治諸瘡毒行周身活血追風散氣此又一種名同物異

草寶云治跌打損傷消腫散瘀要藥 百草鏡云治乳癰腫毒金瘡止血杖丹棒瘡喉癰雙蛾咳嗽急慢驚風 延緣堂方土三七春夏用葉秋冬用根搗汁一鍾用水酒漿和勻灌入自效

楊痢毛入肉作痛 秘方集驗土三七亦名金不換用其葉擣爛立塗卽止

千年老鼠屎

紫背天葵根也百草鏡云二月發苗葉如三角酸向陰者紫背爲佳其根如鼠屎外黑內白三月開花細白結角亦細四月枯按東璧綱目菟葵下註云卽紫背天葵於主治只言其苗不及其根之用今爲補之

出金華諸暨深山石罅間者根大而佳春生夏枯秋冬罕有

性涼清熱治癰疽腫毒疔瘡癰痺跌撲風犬傷七種疝氣痔瘡勞傷

百草鏡

癰瘡敷藥 醫宗彙編用紫背天葵子每歲用一粒同鯽魚搗爛敷之立消

癰癧 救生苦海用千年老鼠屎搗碎同好酒入瓶煮一炷香隔三日隨意飲醉蓋被取汗數次自效○黃賓江傳天葵丸專治癰癧紫背天葵一兩五錢海藻海帶昆布貝母桔梗各一兩海螵蛸五錢共爲細末酒糊丸如梧桐子大每服七十丸食後溫酒下此方用桔梗開提諸氣貝母消毒化痰海藻昆布以軟堅核治療癧之聖藥也

諸疔初起 經驗集凡疔初起必發寒熱疼痛欲

成囊癰者用荔枝核十四枚小茴香二錢紫背天葵四兩蒸白酒二壺頻服卽愈

辟瘟草

魚鼈金星

鳳尾金星

一名獨腳金雞又名鴨腳金星佩帶之可辟疫氣近見市者有小葉而短狹大葉而長狹者皆非辟瘟草也小者名七星草俗呼骨牌草惟無五六蓋五六乃天地之中不易結寄生石樹間大者名劍脊金星長一二尺生山溪澗旁老則葉背皆起星此二種東璧綱目已收載辟瘟草葉如鴨腳有三岐一莖一葉氣味清香老則有星香氣亦減○百

草鏡云鴨腳金星卽辟癰草葉如鴨腳大而薄背
生星點至八九月間星老乃黃乾之其氣香冽不
變若葉太老及經水者便不香端午採嫩者陰乾
用勿見火

性平味苦氣香治傷寒瘡痢風氣腫毒時氣惡氣
散邪風乳癰熱瘡小兒痘眼疳喉閉生蛾同金鎖
匙汁醋漱痧脹香竄疎經絡治疳

百草鏡治痧脹用鴨腳金星草曬乾爲末取少許
啗鼻中或煎服亦可

小泉驗方疔腫用鴨腳金星草煎酒一服卽消

魚鼈金星

生背陰山石上立夏後發苗根細如織線蔓延石上葉不對節一長一圓長者爲魚圓者爲鼈魚葉經霜則老背起金星惟鼈葉無亦生西湖飛來峯絕頂

治臟脹癰癥火毒症 採藥志云性涼治痰火毒行上部 采藥方消痞塊痰核疥癩

承師方治烟筒戳傷喉用魚鼈金星草煎濃湯咽喉中傷立止疼而愈 承師方一作承寧傳方

鳳尾金星

根類竹根黃色有鬚葉類建蕙而短長不滿尺春
月發苗背有點子兩行相對有數十粒極密秋霜
後乃黃生石山下其根蔓生○百草鏡金星鳳尾
其葉細碎形似鳳尾三月發苗葉背有星作細白
點子秋後乃黃生古墻石塹中背日者佳惟實熟
症可用

性涼治吐血咽喉火毒諸丹毒發背癰疔 百草
鏡癰疔非陽毒及非金石藥毒者戒用謝雲溪云
性太涼男女忌服雖取效一時但精血受寒不能
生育爲虞耳○寧德縣志白腳者治痢○家寶方

治喉癰金星鳳尾草搗汁加米醋數匙和勻用竹
筍裹新棉花蘸汁點患處稠痰隨筋而出亦治喉
風

水茸角

華陀中藏經狀如鬼腰帶竹小窠子生三四月開
黃花葉如百合六七月採兩浙呼爲合萌

治吹竅 水茸角不拘多少新瓦上焙乾爲末臨
臥酒調服二錢次日卽愈已破者略出黃水亦效
老鴉蒜

一名銀鎖匙一名石蒜一枝箭百草鏡云石蒜春

初發苗葉似蒜又與山茨菰葉相似背有劍脊四
散布地七月苗枯中心抽莖如箭幹高尺許莖端
開花四五成簇六出紅如山丹根如蒜色紫赤肉
白有小毒理喉科綱目主治失載○金士彩云此
吐藥也且令人瀉

治喉風痰核白火丹肺癰煎酒服

對口初起 家寶方用老鴉蒜搗爛隔紙貼之乾
則頻換其毒自消

雙單蛾 神醫十全鏡老鴉蒜搗汁生白酒調服
嘔吐而愈

洗痔漏 沈惠如傳方老鴉蒜鬼蓮蓬搗碎不拘
多少好酒煎置瓶內先熏待半日湯溫傾出洗之
三次全愈

痰火氣急 王都官方蟬螂花根卽老鴉蒜洗焙
乾爲末糖調酒下一錢

玉如意 四方如意草

一名箭頭草剪刀草大風草百草鏡云生山間或
田塍有紫白二種紫花者名金剪刀白花者名銀
剪刀入藥白花者良葉與人家盆栽者無異但花
小葉狹長而尖微有別耳○敏按山野間如意草

葉上尖下圓深青色與人家所種無異惟葉色稍深綠耳其花亦有紫白二種至狹長之葉者乃地丁草所謂銀剪刀白花者是也金剪刀紫花者是也與如意草一類二種其性情功效亦不甚遠葛祖方治痞塊瘡毒迫風理氣逐疫肺癰

乳癰初起 百草鏡用玉如意草一兩白酒煎飽肚時服初起者二服卽消成濃者兩劑必潰已潰者三服易斂疼痛者服之能止

乳癰疔瘡 救生苦海白花如意草一名銀剪刀生田野山間較人家種者葉狹花小搗汁服之渣

敷患處

兒背生泡 集驗小兒背上起白泡紫如綴珠一
二日卽破膿血外流癢甚一處方好一處又起用
如意草搗爛敷之長巾縛定一夜而愈

腳上生瘡 集驗治腳上生瘡亂孔如蜂窩者用
如意草搗爛敷之或用乾如意草爲末雞子清調
敷亦可

按此種又與地丁草不同地丁小而此種大地丁
葉深綠此葉淺綠有云家種如意草亦有白花者
乃眞玉如意野生者仍是銀剪刀耳性劣不若家

種者良

痘兒氣急 劉氏驗方白花地丁不拘多少煎湯

服之立止

炎天火痘 劉氏驗方暑月出痘有一種火痘徧

身皆紅者是也用白花地丁搗汁白酒沖服立解

四方如意草

汪連仕草藥方其葉四處分開一名地靈芝乃瑞

草四方開花莖多葉繁如如意

治神鬼二箭活血追風

水楊梅

一名金勾葉家母利藤勾子此草結紅子如楊梅
小兒採食之綱目有水楊梅云其實類椒乃地椒
是別一種

葉點牙疼取葉搗汁點眼角飲香茶一鍾閉目少
頃牙疼卽止

野靛青

一名鴨青處處有之如莧菜葉尖中心有青暈
治結熱黃疸疔瘡毒疼痛生肌長肉

困來草

劉羽儀經驗方此草又名水灌頭子如桑子但桑

子長而此子圓又如茶紙子但茶紙子紅而此子綠又不可不辨

治黃疸 用困來草石茺荜即鵝兒不食草二味洗淨搗

汁冲陳酒一大鍾服之四五次自愈

走馬胎

出粵東龍門縣南困山中屬廟子角巡司所轄山大數百里多低槽深峻巖穴皆藏虎豹藥產虎穴形如柴根乾者內白嗅之清香研之膩細如粉噴
座幽香頗甜淨襲人

研粉敷癰疽長肌化毒收口如神

蒼耳子油

物理小識出山東

治瘋

飛鸞草

秋景盦雜記飛鸞草生錢塘葛嶺後山金鼓洞洞在道士庖福之右涉泉入洞暗處仰見一線天光中見有此草形如飛鸞有頭有翅有三尾雪中開五色花中抽一莖直上着花葉狀如金絲荷葉草面綠而背銀紅色光者可治病有黑毛而不開花者乃斷腸草能殺人不可誤采也故須雪中見

花者爲眞根如老薑入藥用葉

性上升味苦寒治咽喉及口內諸病取葉七片滾

水冲服立愈

此草味雖苦寒性反不下降而獨上升見物卽沾竄烈可知以此草冲於

水中用指蘸之則苦寒全在指上其水卽淡若沾唇則味在唇上水雖咽下而味不入喉也故治咽喉者須以小管灌於喉中或令病人張大口用匙灌入直達喉所則味在患處矣金鼓洞左近背陰地亦有之

青烟白鶴草

汪連仕云草生海島其性最行氣味甚猛烈色綠如翠能入氣分血分消積氣散鬱血續筋骨土人以煎膏療病治內外一切症其汁卽阿魏近日方

土於後營打枝巷葉家園取樹脂偽充射利又有
以秦皮代充者眞者亦稀見矣

本草綱目拾遺卷四終

本草綱目拾遺

卷四

青烟白鶴草

三

